

**Ն.Ս.Օ.Տ.Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ  
ՊԱՏԳԱՄԸ ՏԵՐ ՀԻՍՈՒՍ ՔՐԻՍՏՈՍԻ  
ՍՈՒՐԲ ՀԱՐՈՒԹՅԱՆ ՏՈՆԻ ԱՌԻԹՈՎ**

(ապրիլի 5, 2015 թ., Սուրբ Էջմիածին)

Յանուն Հօր եւ Որդւոյ եւ Հոգւոյն Սրբոյ. ամէն:

«Այսօր հրեշտակք յերկնից իջեալ  
տան զաւետիս մարդկան.  
յարեաւ իսաչեալն եւ յարոյց  
զձեզ ընդ ինքնեան»  
**(Շարական):**

Սիրելի՛ հավատավոր զավակներ Մեր ի Հայրենիս եւ ի Սփյուռս,

Քրիստոսի հրաշափառ Հարության ուրախությունն է վերստին թեւածում մեր հոգիներում: Բերկրում ենք յուղաբեր կանանց նման, ուլքեր թափուր տեսան Փրկչի գերեզմանը եւ հրեշտակներից լսեցին Նրա Հարության ավետիսը: Յնծում ենք վերնատանը հավաքված առաքյալների եւ Էմմավուսի ճամփորդների պես, որոնց հարուցյալ Տերը երեւաց եւ փարատեց նրանց տարակույսներն ու արտանայությունը: Հարության լույսի շողերով այլեւս լուսավորված է իսավարյալ երկինքը, թողափված են իսաչելության վիշտն ու տխրությունը: Բացված է դրախտը, խորտակված է դժոխքը, պարտված է մահը, եւ հաղթանակած՝ կյանքը:

Քրիստոս՝ Փրկիչ մեր Տերը, իսաչի վրա Իր գոհագործությամբ եւ հրաշափառ հարությամբ մարդկության համար դարձավ փրկության պատարագ, որ բաշխվում է ամենուր՝ հավատքով ընդունողներին: Տերունական անգին փրկագործությունը երկնից արքայությունը ժառանգելու շնորհին է արժանացնում հավատացյալ հոգիներին, ինչպես եւ շարականագիրն ասում է. «Յարեաւ իսաչեալն եւ յարոյց զձեզ ընդ ինքնեան»:

Մեր ժողովրդի ընթացքը պատմության հողովայններում հաճախ եղավ նմանություն Քրիստոսին: Հաճախ չարչարանաց Գողգոթա բարձրացանք, իսաչակից եղանք Տիրոջը եւ Նրա հարության հավատքով հարություն առանք: Տիրոջ շնորհով մեր ժողովուրդը հաղթահարեց իր դեմ մոլեգնած դավերն ու ավերները, հալածանքներն ու կոտորածները, վառ պահեց հույսն իր վերածննդի, իր ապահով ու լուսավոր կյանքի:



«Լուսացայց սրբուրթամբ զձեռս իմ, և շուրջ եղեց զսեղանով քով,  
Տե՛ր» (Սաղմ. ԻԵ. 6)



Ս. Հարության տոնին մատուցված Հայրապետական Ս. Պատարագին





«Յարեաւ խաչեալն և յարոյց գձեգ ընդ ինքեան» (Ճարական)

Քրիստոսի Սուրբ Հարության լուսապայծառ տոնի այս հիասքանչ օրը աղոթում ենք նաև Յեղասպանության մեր նահատակների համար: Մեկ դար առաջ էր, երբ մեր ժողովրդի գավակները հայ եւ քրիստոնյա լինելու համար անլուր տառապանքներով Յեղասպանության ենթարկվեցին: Նրանք նահատակության պատկան ընդունեցին՝ առաքյալի խոսքի ճշմարտությունն ունենալով իրենց սրտում. «Եթէ մեր այս հողեղէն տունը, որ մեր մարմինն է, աւերուի, Աստուծոց շինուած անձեռակերտ յախտենական տուն ունենք երկնքում» (Բ. Կորնթ. Ե. 1): Աշխարհին, ողջ մարդկությանը մեր ժողովուրդն իր նահատակությամբ եւ հարուցյալ կյանքով վկայեց հարության հրաշքի ճշմարտությունը: Եղանք խացյալ, եղանք վշտահալած, բայց ո՛չ հուսահատ, վիրավոր, բայց ո՛չ տկար, աշխարհասփյուռ, բայց ո՛չ անհայրենիք: Կորուսյալ հայրենիքի սերը սրտում՝ մեր ժողովուրդը պատմական Հայաստանի արեւելյան հատվածում վերակերտած պետականության ներքո եւ Սփյուռքի համայնքներում նոր կյանք վերընձյուղեց՝ հավաստելով, որ իր կենաց ծառը՝ հավատքի անսասան վեմին արմատացյալ, կենսատու գորությամբ պտղաբերում է եւ ազգն ու հայրենիքը շենացնող գավակներ ծնում:

Հայոց ցեղասպանության համընդհանուր ճանաչման ու դատապարտման համար մեկ դար պայքարեցինք եւ շարունակում ենք պայքարել՝ արդարության հաղթանակի հավատով: Աշխարհը երբեմն լսեց մեզ, երբեմն անտեսեց, որովհետեւ միշտ չէ, որ ունկնդիր է եւ հավատարիմ Քրիստոսի բերած խաղաղության եւ մարդկանց մեջ հաճության պատգամին, ի հետեւանս որի՝ մարդկության նորագույն պատմությունը կրկին մթազնեց նոր ցեղասպանությունների եւ պատերազմների խավարով: Այսօր եւս մարդկային կյանքն ալեկոծվում է հակամարտություններով ու արյունահեղություններով: Մարդկության օրրան Երկիր մոլորակի վրա տենչալի խաղաղությունը եւ համընդհանուր հաճությունն ու համերաշխությունը տակավին մնում են որպես չիրականացված երազանք: «Աստուած մահ չի ստեղծել, եւ Նա չի ուրախանում ողջերի կորստեան համար», - ուսուցանում է աստվածաշնչյան իմաստությունը (Իմաստ. Ա. 13): Ավելին՝ խացյալ եւ հարուցյալ Իր Միածին Որդու միջոցով Աստված պարգեւել է շնորհը մահվանից հառնելու, որը պարտավորեցնում է ազգերին եւ պետություններին միասնական ու միահամուռ կամք դրսևորել՝ կանխելու համար մարդկության խաղաղությունն ու բարօրությունը վտանգող սպառնալիքները, առավել նախանձախնդիր լինելու արդարության ու ճշմարտության հաստատման, եղեռնագործությունների համընդհանուր դատապարտման գործում, այլապես աշխարհի չարաղետ ընթացքները պիտի շարունակեն առաջնորդել դեպի նոր ողբերգություններ: Մարդկությունը պարտք ունի սրբելու աշխարհում ծովացող արցունքը, լուսավոր մանկություն երագող որբ ու կարոտյալ երեխաների անօգնական հայացքների, լաց ու ճիչի առջեւ լռեցնելու որոտները մահաբեր զենքերի, արմատախիլ անելու աղքա-

տության չարիքը: Խաչելությունն աշխարհում պետք է հաղթահարվի եւ փոխարինվի հարությանը:

Միրելի՛ բարեպաշտ հավատացյալներ, այսօր, երբ ունկնդիր ենք «Յարեա խաչեալն եւ յարոյց զձեզ ընդ ինքեան» ավետիսին, քաջալերվենք հոգով, ապրենք որպես Քրիստոսի հետ մահից վեր հառնած ժողովուրդ, Քրիստոսին հավատարիմ եւ հարության գործությունն ունեցող ժողովուրդ: Դիմագրավենք մեր կյանքի մարտահրավերները եւ նեղությունների ու դժվարությունների չարչարանաց մեր խաչը ծաղկյալ դարձնենք բոլորանվեր մեր ջանքերով, հայրենանվիրումի, ազգանվիրումի նոր գործերով: Ազգային, պետական, հասարակական մեր կյանքը, հոգեւոր-եկեղեցական մեր անդաստանը շենացնենք «զի Աստուած ընդ մեզ է» աներկբա հավատով եւ քայլենք դեպի վերելքի նոր հորիզոններ, դեպի հաղթանակը մեր արդար դատի:

Քրիստոսի Սուրբ Հարության տոնի խնդությունը Մեր հոգում՝ Մեր բարեմաղթանքներն ենք հղում Առաքելական մեր Սուրբ Եկեղեցու նվիրապետական աթոռների գահակալներին՝ Ն.Ս.Օ.Տ.Տ. Արամ Ա. Մեծի Տանն Կիլիկիո Կաթողիկոսին, Երուսաղեմի Հայոց Պատրիարք Ամենապատիվ Տ. Նուրհան արքեպիսկոպոս Մանուկյանին, Կոստանդնուպոլսի Հայոց Պատրիարք Ամենապատիվ Տ. Մեսրոպ արքեպիսկոպոս Մութաֆյանին, Քույր եկեղեցիների շնորհագարդ հոգեւոր Պետերին:

Մեր Տիրոջ հրաշափառ Հարության ավետիսով ողջունում ենք Սուրբ Պատարագի արարողությանը ներկա Հայաստանի Հանրապետության նախագահ Տիար Մերժ Սարգսյանին եւ առաջին Տիկնոջը, ողջույն ենք հղում Լեռնային Ղարաբաղի Հանրապետության նախագահ Տիար Բակո Սահակյանին, հայոց պետական ավագանուն՝ մաղթելով արգասալի ծառայություն եւ նոր ձեռքբերումներ՝ հանուն մեր երկրի հզորության, մեր ժողովրդի բարօրության ու առաջընթացի: Մեր բարեմաղթանքները եւ օրհնությունն ենք բերում այստեղ ներկա Հայկական բարեգործական ընդհանուր միության նախագահ Տիար Պերճ Սեդրակյանին եւ Միության անդամներին, ովքեր հայրենիքում անցկացնում են ՀԲԸՄ տարեկան համագումարը: Սուրբ Հարության ավետիսով Մեր օրհնությունն ենք բերում Հայաստանում հավատարմագրված դիվանագիտական առաքելությունների եւ միջազգային կազմակերպությունների ղեկավարներին ու ներկայացուցիչներին՝ մաղթելով գործոց հաջողություն՝ ի խնդիր մեր երկրների բարեկամության ամրապնդման եւ գործակցության գորացման:

Քրիստոսի Հարության տոնի առիթով շնորհավորում ենք հավատավոր Մեր զավակներին ի սփյուռս աշխարհի եւ մեր Սուրբ Եկեղեցու ուխտյալ սպասավորներին՝ բերելով Հայրապետական Մեր սերն ու օրհնությունը, հայցելով գորակցությունն ու ամենառատ շնորհները հարուցյալ մեր Փրկչի:

Աղոթում ենք, որ Ամենակալ Աստված Իր անսահման ողորմության ներքո պահպանի աշխարհը համայն, գորացնի մարդկանց սրտերում խաղաղության, արդարության եւ ճշմարտության հոգին, օրհնի ապահով ու երջանիկ կյանք կառուցելու մարդկային ջանքերը: Մեր հայցն ենք բարձրացնում երկինք, որ Տերը խաղաղ պահի մեր հայրենիքը, հավատքով պայծառ եւ ոգով արի՝ աշխարհասփյուռ մեր ժողովրդին, Իր կենարար շնորհներով առաջնորդի՝ ընթանալու դեպի կյանքի լուսավոր հորիզոններ:

*Թող հարուցյալ Տիրոջ սերը եւ խաղաղությունը լինեն մեզ հետ՝ այսօր եւ միշտ եւ հավիտյանս. ամեն:*

**ՔՐԻՍՏՈՍ ՅԱՐԵԱԲ Ի ՄԵՌԵԼՈՅ  
ՕՐՀՆԵԱԼ Է ՅԱՐՈՒԹԻՒՆՆ ՔՐԻՍՏՈՍԻ**